

欽定大清會典事例

欽定大清會典事例卷一千九十九

國子監

六堂課士規制

課程

課程。○課肄業生之法。每月望日。祭酒司業課一次。試以四書文一。詩一。每月朔日。博士廳課一次。試以經文經解及策論。初三日。六堂助教課一次。十八日。六堂學正學錄課一次。各試以四書文一。詩一。或賦一。每月朔望。博士廳集諸生講經解義一次。每月初旬。助教講書一次。每月望後。學正學錄講書一次。每三日讀制義一

篇。每日寫楷書數百字。至十日呈助教等批判一次。每日將讀書有得及疑義逐條劄記。至三日呈助教等批晰一次。朔望由助教等呈堂查驗一次。每日讀書寫字。令諸生自立一冊登記。朔望由博士廳呈堂查驗一次。每月上中下旬。博士廳稽察南學三次。○又定滿漢肄業生於朔望日隨行釋奠禮外。有講書覆講上書覆背諸課程。每月三次。周而復始。祭酒司業及六堂學官講四書性理通鑑。博士講五經。○順治九年。

敕諭國子監祭酒司業等官。聖人之道。如日中天。上資之以圖治。下學之以事君。爾等當嚴督諸生。盡心訓誨。諸生當敬奉師教。身體力行。教有成效。時維師長之功。學有實用。方盡弟子之職。如訓導不嚴。怠肆失學。爾師生俱難免咎。尚其勉之。○康熙八年。

敕諭國子監祭酒司業等官。朕惟聖人之道。高明廣大。昭垂萬世。所以興道致治。敦倫善俗。莫能外也。朕纘承丕業。文治誕敷。景仰

先聖至德。今行辟雍釋奠之典。將以鼓舞人材。宣布教化。爾監官當嚴督諸生。潛心肄業。諸生亦宜身體

力行。朝夕勤苦。若學業成立。可裨實用。則教育有功。其或董率不嚴。荒乃職業。爾師生難辭厥咎。尚其勉之。毋忽。○二十一年

諭。國子監乃國家養育人材之所。近聞司教之官。不將監生嚴加約束教誨。縱之遊戲。又其甚者。間雜之徒。任行出入。竟以國子監為遊戲之地矣。爾等傳諭祭酒司業等官。嚴行禁止。○二十三年

諭。助教官員。職掌教習。廢益官生。應選優於文學者補用。若用文學庸劣之人。何以表率生徒。以後著吏部考取。仍將試卷送內閣閱看具奏。○四十一年

御製訓飭士子文。勒石太學。其文曰。國家建立學校。原以興行教化。作育人才。典至渥也。朕臨御以來。隆重師儒。加意庠序。近復慎簡學使。釐剔弊端。務期風教修明。賢才蔚起。庶幾棧樸作人之意。乃比來士習未端。儒教罕著。雖因內外臣工奉行未能盡善。亦由爾諸生積錮已久。猝難改易之故也。茲特親製訓言。再加儆飭。爾諸生其敬聽之。從來學者先立品行。次及文學。學術事功。原委有敘。爾諸生幼聞庭訓。長列宮牆。朝夕誦讀。寧無講究。必也躬修實踐。砥礪廉隅。敦孝順以事親。秉忠貞以立志。窮經考義。毋雜荒誕之

談取友親師。悉化驕盈之氣。文章歸於醇雅。母事浮華。軌度式於規繩。最防蕩軼。子衿能達。自昔所譏。苟行止有虧。雖讀書何益。若夫宅心弗淑。行己多愆。或蜚語流言。脅制官長。或隱糧包訟。出入公門。或唆撥姦猾。欺孤凌弱。或招呼朋類。結社要盟。乃如之人。名教不容。鄉黨弗齒。縱倖逃褫。搆。濫竊章縫。返之於衷。能無愧乎。况乎鄉會科名。乃掄才大典。關繫尤鉅。士子果有真才實學。何患困不逢年。顧乃標榜虛名。暗通聲氣。夤緣詭遇。罔顧身家。又或改竄鄉貫。希圖進取。鬻陵騰沸。罔利營私。種種情弊。深可痛恨。且夫士

子出身之始。尤貴以正。若茲厥初。拜獻便已。作姦犯科。則異時。敗檢踰閑。何所不至。又安望其秉公持正。為國家宣猷樹績。膺後先。疏附之選哉。朕用加惠爾等。故不禁反復惓惓。茲訓言頒到。爾等務共體朕心。恪遵明訓。一切痛加改省。爭自濯磨。積行勤學。以圖上進。國家三年登造。束帛弓旌。不特爾身有榮。即爾祖父亦增光寵矣。逢時得志。甯俟他求哉。若仍視為具文。玩愒勿做。毀方躍冶。暴棄自甘。則是爾等冥頑無知。終不能率教也。既負栽培。復干咎戾。王章具在。朕亦不能為爾等寬矣。自茲以往。內而國學。外而直

省鄉校。凡學臣師長。皆有司鐸之責者。並宜傳集諸生。多方董勸。以副朕懷。否則職業弗修。咎亦難逭。毋謂朕言之不豫也。爾多士尚敬聽之哉。○雍正二年。敕諭國子監祭酒司業等官。朕惟聖人之道。昭揭日月。彌綸天地。萬世帝王。下逮公卿士庶。罔不仰遵成憲。率由誨言。我國家尊崇

至聖。遠邁前代。朕纘承大統。古訓是學。惟日孜孜。茲雍正二年三月朔日。親詣辟雍。祇謁

先師孔子。行釋奠禮。思以鼓勵羣英。丕隆文治。爾監臣宜嚴督諸生。善為導誘。爾諸生亦當殫心肄業。實

踐躬行。秉端方以立身。敦孝弟以興誼。勿營奔競。勿事浮華。文必貴乎明經。學務期乎濟世。俾品成詣進。以副朕教育至意。○乾隆元年奏准。學中設簿。每日令助教等官一人稽察出入諸生。如有事故告假者。悉令將事由登記於簿。月終移送監丞呈堂察覈。有肆行出入及出入過多者。勒令出學。本堂師容隱者。查出記大過一次。○二年奏准祭酒等應嚴立課程。隨時考校。俾內外肄業生恪守成規。一同講習。仿宋儒胡瑗經義治事兩齋之法。嚴課諸生。凡明經者或治一經。或兼他

經務取

御纂折中傳說諸書。探其原本。於人倫日用之理。切實講明。其治事者。如歷代典禮賦役律令邊防水利天官河渠算法之類。或專治一事。或兼治數事。務窮其源流。考其利弊。考試之時。必以湛深經術。通達事理。驗稽古愛民之識。三年期滿。即將所學分別等第。以示勸懲。○又奏准。在內諸生。每人就所治之經。各給

御纂經書一部。按日研看。註明課單。有心得及疑難處。逐條劄記。三日一次。呈繳該助教等逐條批晰。

朔望呈堂。分別優劣。其隨時質問者不拘。至治
事法。俟一年後舉行。應將治事所需書籍。先期
購買。該助教等豫先討論。在外肄業生所治之
經及劄記所得。朔望交該助教等批晰。次期朔
望呈堂。○三年。

敕諭國子監祭酒司業等官。仰惟我朝

列祖。以聖人之道治天下。用開太平洪業。

聖祖

世宗。重道隆

師。超越百代。作人造士。化洽寰區。朕嗣守丕基。勤求

至道。所以廣厲學宮。祇紹

前烈。越乾隆三年三月二日。親詣辟雍。釋奠於

先師孔子。升堂進講。嘉與諸生闡明聖教之本原。帝治之盛軌。夫端教術。育賢才。厥惟師儒之功。正身心。修德業。以為國家之用。諸生其可弗勉哉。詩曰。古之人無斃。譽髦斯士。放勳曰。使自得之。又從而振德之。我

祖宗教澤涵濡。薰陶長養。百年於茲。正學昭明。揭若日月。爾監欽承至訓。振作而鼓舞之。罔有怠斃。諸生率乃攸行。敦本務實。希賢希聖。夙夜罔愆。俾國家文治。

光裕於億萬年。懋哉懋哉。○四年。奏增南學規條。教課宜以實行為先。諸生入學之始。止憑文字收錄。其心術人品。概乎未知。及師生相習既久。未有不洞悉其微者。嗣後肄業諸生。有剽獵浮華。不修實行者。助教等即行糾舉。勒令出學。如有徇隱姑容者。記大過一次。○五年。

訓飭太學士子及司訓等官。成均課士之道。惟貴躬行實踐。不在多立科條。如視為具文。雖再增條款。又復何補。是惟在國子諸生。自知黽勉。則古稱先務為明體達用之學。毋役役於祿位功名之念。而司訓課之

責者。又復善為誘掖。切加勸懲。則辟雍鐘鼓。教化聿興。而珪璋特達之士。亦從此輩出矣。○又

諭

士為四民之首。而太學者教化所先。四方於是觀型焉。比者聚生徒而教育之。董以師儒。舉古人之成法。規條亦既詳備矣。獨是科名聲利之習。深入人心。積習難返。士子所為汲汲皇皇者。惟是之求。而未嘗有志於聖賢之道。不知國家以經義取士。使多士由聖賢之言。體聖賢之心。欲使之為聖賢之徒。而豈沾沾焉。文藝之末哉。朱子同安縣諭學者云。學以為己。今之世父所以詔其子。兄所以勉其弟。師所以教其弟。

子。弟子之所以學。舍科舉之業則無為也。使古人之
學止於如此。則凡可以得志於科舉斯已爾。所以孜
孜焉愛日不倦。以至於死而後已者。果何為而然哉。
今之士惟不知此。以為苟足以應有司之求矣。則無
事乎汲汲為也。是以至於惰游而不知返。終身不能
有志於學。而君子以為非士之罪也。使教素明於上。
而學素講於下。則士者固將有以用其力。而豈有不
勉之患哉。諸君苟能致思於科舉之外。而知古人之
所以為學。則將有欲罷不能矣。觀朱子此言。洵古今
通患。夫為己二字。乃入聖之門。知為己則所讀之書。

一一有益於身心。而日用事物之間。存養省察。固然自修。世俗之紛華靡麗。無足動念。何患詞章聲譽之能奪志哉。况即為科舉。亦無礙於聖賢之學。朱子云。非是科舉累人。人累科舉。若高見遠識之士。讀聖賢之書。據我所見。為文以應之。得失置之度外。雖日日應舉。亦不累也。居今之世。雖孔子復生。也不免應舉。然豈能累孔子耶。朱子此言。即是科舉中為己之學。能為己。則四書五經。皆聖賢之精蘊。體而行之。為聖賢而有餘。不能為己。則雖舉經義治事而督課之。亦糟粕陳言。無裨實用。浮偽與時文等耳。故學者莫先

於辨志。志於為己者。聖賢之徒也。志於科名者。世俗之陋也。國家養育人材。將用以致君澤民。治國平天下。而囿於積習。不能奮然求至於聖賢。豈不謬哉。朕膺君師之任。有厚望於諸生。適讀朱子書。見其言切中士氣流弊。故親切為諸生言之。俾司教者知所以教。而為學者知所以學。○六年奏准。太學肄業規條。明經治事之外。仍令士子講習時藝。以應鄉試。今恭遇

欽定四書文告成。清真雅正。誠為舉業正宗。諸生有志觀光。自宜朝夕諷誦。奉為正鵠。伏乞

賞給六堂每堂五部。八旗官學每學五部。共七十部。則
師徒講習有資。而文風益加振起矣。○九年

諭黃施鶚著仍留國子監博士之任。令其啟迪諸生。如
果勤於訓課。爾監具奏請旨。加以升銜。示之鼓勵。朕
觀今之秉鐸者。與肄業者。惟以成均為仕路之捷徑。
所謂古之學者為己者。百無一二。爾祭酒等亦應知
此為世道人心之害。使博士與諸生沈潛踐履。則天
爵修而人爵隨之矣。如惜其材品。或致淪棄。且別無
鼓舞之方。殊不知天下之大。州縣之多。豈少此一二
能幹之縣令乎。加之升銜而不離其任。則其身已榮。

且成全多材。是化一二而百十也。爾監其永遵之。

嘉慶八年。

敕諭國子監等官。我國家

列聖重光。以典學親

師為首務。羣士霑濡化雨。浹髓淪肌。朕紹承

大烈。嘉慶三年。即舉臨雍之典。八年於茲。兢兢業業。不

敢斯夕。愆忘。今仰荷

洪慈。武功歲事。文教宜修。首善之地。尤加意焉。夫學以

明倫為本。士以喻義為先。倫不修而以文賁飾。義不

明而以利計私。何以為士子之倡乎。學校之科條。非

不燦然。顧或於倫物不躬行。則三德六行。皆空華矣。或於利義不明辨。則服古入官。皆市道矣。爾監臣可不孜孜以是道其國子。爾多士可不汲汲以是臻於高明。毋以為迂闊而遠於事情。毋以為陳言而不求切已。朕所厚望於臣工庶士。滌濯其心。誠勤無懈。以培植賢才。為國家楨幹焉。各宜交勉。○十六年

諭。多山等奏國子監漢博士。自嘉慶十四年。歷選外府教授。均以告病告休。咨部開缺。續選之員。亦久未到任。員缺久懸等語。國子監漢博士一缺。向例由外省府教授推升。而府教授多係論俸升轉。資深年老之

員。往往不能赴京供職。應如何更定選法。俾人缺得宜。不致曠官。著吏部議奏。欽此。遵。

旨議定。助教既由學正學錄升任。其博士輪用京升時。亦應由學正學錄論俸推升。歸入月選。帶領引見。其由教授推升博士之員。僅有無故遲延。逾限在三月外者。即開缺另選。○道光三年。

敕諭國子監祭酒司業等官。朕惟化民成俗。基於學校。興賢育德。責在師儒。矧夫成均首善之地。風勵天下。實始於茲。洪惟

列聖稽古右文。二百年來。人材蔚起。粵我

皇祖肇建辟雍。鼓鐘之風。有邁前代。逮我

皇考。武功既歲。文德誕敷。朕嗣位之三年。聿修茂典。爰於二月上丁。躬親釋奠。越六日癸丑。臨雍講學。圜橋觀聽。雲集景從。朕甚嘉焉。夫學有本原。士先器識。漸摩濡染。厥有由來。咨爾監臣。式茲多士。尚其端乃教術。正乃典型。毋即於華。毋鄰於固。入孝出弟。擇友親師。庶幾成風。紹休

聖緒。惟爾監臣。無曠厥職。欽哉。○咸豐三年。

敕諭國子監祭酒司業等官。朕惟古者建國。教學為先。矧成均為首善之地。四方於是觀型。尊賢育才。誕敷

文德致治之原。實基於此。我朝重道崇儒。超越前代。列聖涵濡樂育。化洽寰區。

皇考臨御天下三十年。無日不以闡明聖教。培養人才為首務。朕纘承大統。茂典紹修。爰於咸豐三年二月上丁。親詣

先師孔子廟行禮。越六日癸未。臨雍釋奠。講學。圍橋觀聽。濟濟峩峩。朕甚嘉焉。夫教術隆則士習端。士習端則風俗懋。正誼明道。坊表羣倫。爾監臣所以奉職也。進德修業。砥厲廉隅。爾多士所以植品也。陶淑漸摩。交修勿替。先之以入孝出弟。敦之以言物行恆。毋

驚浮華。毋矜聲譽。鼓舞而振興之。是誠董勸者之責矣。欽哉。○同治元年

諭。太學為自古培植人材之地。我朝振興庠序。加意教習。

世宗憲皇帝賞給庫銀。增置黌舍。首善之區。四方觀瞻所繫。必得如唐之韓愈。宋之胡瑗。躬行實踐。講明正學。以為表率。人材自能蒸蒸日上。乃近來國子監專以文藝課士。該祭酒等既以是為去取。而士子亦復以是為工拙。於造就人材之道。何裨焉。嗣後於應課詩文外。兼課論策。以經史性理諸書命題。用覘實學。

並著該祭酒等督飭各堂助教學正學錄。分日講說。獎勵精勤。懲戒游惰。黜華崇實。以端趨嚮。其有留心時務。通知古今者。該祭酒等亦當隨時獎勵。以勸多士。該堂官為諸生師長。尤當自飭廉隅。俾知矜式。用副教育人材至意。○光緒十二年奏准。國子監舊藏書籍。漸行散失。今蒙

欽頌

列聖聖訓方略。並咨取各省書局新刻各書。現在南學有書五萬一千四百餘卷。而所缺尚夥。除由監臣捐貲購寫外。應咨行各省學政。曉諭舉貢生

監。如家有藏書情願捐送卷數較多者。奏請
賞給監屬虛銜。如卷數較少。量給扁額。以資鼓勵。

欽定大清會典事例卷一千一百

國子監

六堂課士規制

錄送鄉試

考試校錄

考

錄送鄉試。○康熙三十九年覆准。祭酒司業力行考課之法。考課不缺者。准其應試。若臨期始到。不准入場。○六十一年題准。應試貢監於鄉試前一年起文到部。自鄉試本年正月為始。月課季考無缺。仍取連名互結。及本堂助教等官結狀。方准移送入場。如有頂冒等弊。事發一併治罪。○雍正二年。

臨雍禮成。

命監臣及直省學政錄科時察實能貫通五經諸生。仍聽以五經應試。○六年覆准外省貢監赴京闈鄉試者。令本籍地方官取本生地鄰甘結。加具印結。付本生親齎。限鄉試年二月到監。其閩粵滇黔四川湖南。准展限兩月到監。由監移送順天府查明收考。○七年奏准。現在肄業之人。在六年未經定例以前到監者。仍照舊例取其同鄉京官印結。並取五生連名互結。由監查明移送順天鄉試。如有假冒頂替等弊。一經查出。將

出結互結之人一併治罪。○十三年

諭據奏直省貢監生錄科。無論有無本籍地方官文書。皆令取同鄉京官主事以上印結等語。朕思各省地方大小不同。京官有無多寡不一。若概令取具同鄉京官印結。其中遠省貢監無熟識之京官。勢必啟抑勒鑽營之弊。詳細妥議具奏。欽此。遵

旨議定。嗣後遇鄉試之年。除從前已有本籍地方官文結。現在肄業之貢監。由監臣覈明錄送外。其餘貢監生。無論遠近各省。均取地方官文結。親身到監投驗。仍恐尚有頂冒等弊。於錄科時取同

考五人互結。方准收考。○又覆准。從前已有本
地方官文結到監肄業。因期滿及告假回籍。於
鄉試年到監。名為復班之貢監生。有為期未久。
本監現可稽察者。准其送考。儻稽察不實。有頂
冒情弊。事覺將監臣交部議處。○又議准。今年
鄉試屆期。有本年在京新捐貢監生。若令其取
具本地方官文結。往返需時。勢不能趕赴場期。
暫聽其取同鄉京官印結及五生互結。准其錄
取。後不為例。○乾隆元年奏准。嗣後遇鄉試之
年。在京新捐貢監生。實屬本籍。寫遠難取本地

方官文結者。准取同鄉六品以上京官印結。及同考五生互結。錄科送考。○又奏准在京貢監。從前曾有本籍文結到監肄業。應過鄉試。有案可稽者。遇鄉試之年。許令取同鄉京官印結。同考五人互結。錄科送考。○十六年奏准。本年恭逢

皇太后六旬萬壽。特開

恩科。於十七年三月舉行。將十二年鄉試。曾投本籍文結。至十五年。仍在京鄉試者。並十五年新捐貢生。未及回籍起文者。一體准其取具同鄉京官

印結錄送。○二十四年奏准。冒籍貢監。勒限改
歸原籍。從前考取入監肄業。有籍隸順天及直
隸各州縣者。雖經取有文結。仍行取該地方官
委係土著。並非冒籍。印甘各結到監。方准錄科
送試。再冒籍生員。勒令歸籍。奉

旨。停其一科鄉試。其由生員報捐貢監者。於投考時詳
查。曾否改籍。另取同鄉官切實印結。始行錄送。
其無別項情節。遵例改歸原籍之貢監生。一體
照例停其一科鄉試。○二十五年奏准。來歲恭
逢

皇太后七旬萬壽。本年以逢

皇上五旬萬壽。特開

恩科。照十七年之例。將二十一年鄉試曾投本籍文結。至二十四年仍在京應試者。並二十四年新捐之貢監生。未及回籍起文者。一體准其取具同鄉官印結錄送。○二十七年奏准。貢監由國子監錄科中式者。所有應領旗扁銀。應令赴監查驗。實係本身親領。陸續彙行咨領放給。○四十二年議准。八旗貢監生應鄉試者。由國子監行文各該旗造冊。移送錄科後。徑送順天府。准其

投卷入場。其由禮部查取旗冊轉發之例停止。
○四十三年奏准。順天冒籍貢監。寄居年久。原籍無家可歸者。須赴縣呈報確查。方准入籍。由該縣將土著及合例之貢監。分析申報有案者。起送錄科。其未經呈報。該縣混行起送者。一經中式。如仍有冒籍情事。除將本生叅革外。並將該縣交部議處。○四十四年奏准。四庫全書處。謄錄內。有前由寄籍順天入學。旋經遵例歸籍。並有由

召試二等在館行走各生。不能回籍應試。准其取具

同鄉京官印結。按省分歸於南北中四字號。由本館咨送國子監一體錄科。赴順天鄉試。○四十六年奏准。三十九年以後在甘肅捐監並由生員武生加捐監生。及由甘省捐監在部加捐貢生者。准其赴部補繳銀兩。換給執照錄科時。將各生執照查覈。如未經赴部補捐。即行扣除。不准應試。○五十二年覆准。正途貢監及廩增加捐貢監者。由國子監錄送其俊秀等項捐納貢監。無論小京官官卷旗卷民卷。屆期奏請

欽派大臣一員。會同國子監堂官。於七月二十九三

十等日彙考。三日內揭榜。其編查坐號等事。責成助教。學正等官經理。仍派滿漢御史二員監察。○又奏准。鄉會試二場。改用五經。嗣後本監鄉試考到。亦照鄉會試之例。於五經中隨時拈取出題。不專用一經。○五十三年奏准。嗣後錄科考到。俱令管理國子監大臣。及滿漢祭酒。司業。在署校閱。一次不取。不得再考。○五十四年覆准。在監肄業者。監生。令助教等官臨期識認。其不在監肄業者。雖起有本籍文結。仍取具同鄉京官印結。令出結官識認。其在部候選。及各

館騰錄由各衙門咨送者。亦令取其同鄉官印結。臨場識認。○五十六年奏准。俊秀貢監錄科。改歸貢院。於七月二十日以前取齊。即於二十三日考試。奏請

欽派大臣御史點名入闈。由

欽派大臣閱卷錄取。交國子監衙門照數送場。○嘉慶二年奏准。天文生由各省生監充補者。歸國子監錄科。由順天生員充補者。歸順天學政錄科。○又奏准。本監官員子弟錄科。該員具呈。並取同鄉官識認保結。○六年

諭。向來俊秀監生鄉試錄科。係由國子監考試錄送。因吳省欽條奏。改為欽派大臣在貢院局試。嗣又有御史奏請復舊例者。經禮部議駁未行。此時貢院正值興修。未能在彼錄科。此次俊秀監生。仍由國子監考試。不必欽派大臣。以後或應照舊例。或仍在貢院錄科之處。並著軍機大臣會同禮部一併議奏。欽此。遵旨議定。俊秀貢監。仍令國子監照舊辦理。惟於錄科之後。即將俊秀貢監原卷。封送禮部嚴密儲庫。俟揭曉後磨勘之日。凡由俊秀貢監中式者。均查出錄科原卷。夾於中式試卷之中。覈其筆迹文

理有迥不相符者。舉出究辦。○十九年

諭。向來直省各學政歲科考試取進童生。覆試時定有
敬謹默寫

聖諭廣訓之條。誠以士為民倡。果能平時服誦。相與宣
講。內而砥礪躬行。外而化導鄉俗。自見薰德善良。風
氣日臻淳厚。其直省各學監生。不由童試。素未誦習。
而生員於進取後。亦日久不復循誦。該生員等身列
膠庠。為齊民之表率。尤應令其修德懷刑。導民先路。
著禮部通行直省各學政。嗣後歲科兩試。並貢監生
錄科考遺。均一體敬謹默寫

聖諭廣訓一二百字。其不能默寫者。按其文義遞降等第。及斥置不錄。庶該生監等勤加肄習。共相漸摩。俾鄉曲小民。咸知觀感。用副朕化民成俗之意。○二十一年覆准。本年鄉試。內務府咨送正黃旗鴉鵲戶。姓丁俊秀。劉同升。赴監錄科。與鶴鵲戶張太和。均按投充莊頭子弟舊漢人。歸入漢軍額內錄送。○二十四年覆准。大宛兩縣貢監。無論在籍在監肄業。及隨任讀書候補候選。謄錄教習校錄。欽天監算學肄業生。各項貢監。均由該二縣起文送監錄科。不准各衙門文送。並同鄉官

印結送考。○二十五年議准。嗣後鄉試之年。如有俊秀貢監充當順天府屬幕友。不及回籍起文者。由順天府造具貢監姓名籍貫三代切實文結。聲明係何衙門申送。彙齊送監。本監仍取具同考五人互結收錄。其籍隸順天貢監。仍不准起游幕文書應試。○道光元年覆准。候選中書科中書曹江。由三品廕監生補授大理寺評事。緣事革職。欽奉

特旨。以中書用。應准其錄科應試。○又覆准。世襲恩騎尉文生員鵬程。現在

盛京將軍衙門當差。係未補缺之員。應比照順天候補候選人員由監錄科。○四年議准。孝廉方正知縣。現在吏部投供候選者。照候選人員之例送監錄科。○十一年

諭。各直省學政於歲科兩試。及國子監錄科。務各嚴行按檢。遇有不肖士子帶小本文策者。立予褫革。並嚴究書本買自何鋪。將板片起出銷毀。○十二年

諭。給事中邵正笏奏。國子監考到錄科。關防不密。一摺。國學為造士之區。錄科為進賢之始。自宜關防慎密。嚴絕弊端。據該給事中奏稱。近科以來。考到錄科。每

有託人頂替代倩。並賄囑書役。於該衙門左近窩藏槍手。往來傳遞之事。自應隨時查禁。著國子監堂官於俊秀貢監考到錄科之期。認真稽查。如有前項情弊。即行懲辦。毋稍姑容。○十五年

諭。本年順天鄉試取中舉人。著於本月二十一日在圓明園正大光明殿覆試。並著國子監順天學政查明各該生科試錄科原卷封送軍機處。以備派出之閱卷大臣查對筆迹。○十七年

諭。本科順天鄉試中式原卷及覆試卷。前經降旨著派出之磨勘官覈對。其科試錄科各卷。著一併交磨勘

官覈對筆迹。毋庸封送軍機處。○二十三年覆准。難
廢註冊候銓之員。雖非監生出身。亦一體准其
鄉試。由監驗照錄送。○二十五年議准。俊秀及
廩增附報捐監生。近省在一年內。遠省在十五
月內。尚未換領部照。適逢鄉試。准其執持實收
錄科。如逾限期。驗明執照。方行收考。報捐貢生
亦照此辦理。○二十六年覆准。捐輸人員。如止
有官照而無貢監照。應照議敘人員補捐貢監。
驗照錄科。○二十八年議准。捐納各官。奉
旨作為貢監人員。如應鄉試。予限一年。令補領部監

執照。以便錄科查驗。一年限內。學政錄科。仍准呈驗官照。一年外。即應呈驗部監執照。以歸畫一。○咸豐二年覆准。上年新捐俊秀貢監。取具同鄉京官印結錄送鄉試。有案可稽者。本科不及回籍取文。仍准取結一體錄送。○同治三年奏准。拔貢知縣。判分發到省後。未經署事代理。比照大挑知縣。未經署事代理。准給咨會試之例。准其請咨鄉試。一體錄送。其俊秀貢監。加捐分發試用人員。不得援以為例。○光緒八年奏准。此次恭應

廷試頂戴榮身之孝廉方正。未及回籍。適值鄉試。係廩增附出身者。毋庸補捐貢監。准其就近由國子監錄科送考。其到京稍遲。未及與試者。亦一體由監錄送。以後再遇鄉試之年。仍遵舊例。止准應本省鄉試。○十年。奏定錄科防弊章程。一。慎重出結。貢監投考。責成各直省同鄉京官。正途出身。不與鄉試者出結。依期赴監識認。出結官不到。不准該考生入試。如查有買槍頂名。扶同作弊。將出結官叅處。一。杜絕重考。區分省分。編定場期。人數少者。合數省考試一次。人數

多者。一日全行收考。至大收一場。省分不一。而
人數較少。尚易稽察。仍照舊辦理。一。明示褫罰。
亂號犯規者不錄。頂替代倩傳遞。將該生斥革
治罪。一。磨對筆迹。舊例錄科原卷封送禮部。夾
入中式卷內磨勘筆迹。應申明舊章。磨勘日令
各員認真覈對。

考試校錄○乾隆三年

諭。武英殿錄書需人。著國子監於肄業正途貢生內。擇
其年力少壯。字畫端楷。情願效力者。選十人送殿。以
備謄錄。其在監每月膏火之費。照舊給予。遇缺照例

補送。俟數年後行走若好。該管王大臣秉公具奏。酌量議敘。○三十四年奏准。

武英殿校錄十名。裁去四名。餘六缺歸於吏部。騰錄貢生內選取。停止國子監肄業貢生送補。歲支膏火。於國子監應領肄業銀內。戶部扣留一百八十兩。在。

武英殿支領。所有舊例內班肄業一百五十六名。存一百五十名。○四十五年奏准。

武英殿校錄缺出。吏部無合例堪充之人。仍照舊例。在國子監肄業之拔副優三項貢生內。咨取

十名。由監先期考試。選取以備充補。○嘉慶二十一年奏准。考試校錄。正取十名外。備取三名。俱按名挨次送補。有告假者。即將其次之人送補。○又奏准。各館應刊書籍。俱交

武英殿修書處校對。額設校錄十名。不敷分派。應再增十名。由國子監考送。

考職。○凡考職。由吏部行文知會到監。於前一年五月內。通行直省督撫。轉飭各州縣曉諭。在籍回籍之貢監生。監期已滿。情願赴部考職者。該地方官驗明執照。取具本生族鄰甘結。加具

印文令本生親齋。並帶部監二照。於次年二月內到監投遞。以便咨送。又通行八旗漢軍都統轉飭各佐領曉諭在旗之貢監生。該佐領驗明執照。取具本佐領圖記。都統印文。亦令本生親齋。並帶部監二照。赴監投遞。數送。如係恭逢

恩詔考職。不論監期已滿未滿。俱准送考。○凡恭遇特恩考職。各項貢監生。在

恩詔以前者。正途捐納。均准考試。

恩詔以後貢監生。俱不准考。候補謄錄教習校錄及恩詔前考准之拔貢優貢生。

欽賜副榜。均准一體送考。其已經就職捐職及考授職銜並恩貢生承襲世職與考職品級大小懸殊者。俱不准考。○凡在監肄業諸生。無論正途捐納。均由六堂助教移付繩愆廳送考。並取具同鄉六品以上京官臨場識認印結二紙投遞。其未經在監肄業之正途俊秀貢監生。均准取具同鄉京官印結投遞。毋庸再取本籍文結。俊秀貢監生。如起有本科鄉試文結者。亦准呈明咨送。○凡內外官員親子弟俊秀貢監生。有隨任讀書者。准其取具父兄隨任印文。並取具同

鄉京官印結投遞。○凡游幕俊秀貢監生。准取具各該督撫學政等印文。並取同鄉京官印結投遞。其大興宛平兩縣俊秀貢監生。不准以游幕等文送驗。○凡貢監生考職。查驗合例造冊。同臨場識認印結彙送吏部。查驗考試。○凡貢監生考職。由恩貢及廩生中式副榜者。扣滿六箇月。由增附生中式副榜及歲貢。扣滿八箇月。廩生拔貢。廩生捐貢。扣滿十四箇月。增附生拔貢。增附生捐貢。扣滿十六箇月。俊秀捐貢。四品廕監生。扣滿二十四箇月。捐監生計捐監月分。

扣滿三十六箇月。俱准其考職。恩貢拔貢副貢考列一等。授州同職銜。二等授州判職銜。三等授縣丞職銜。歲貢及捐納貢監生考列一等。授主簿職銜。二等授吏目職銜。令其在籍候選。其在內外班肄業者。如未期滿。仍聽肄業。照舊鄉試。○原定貢監生每年考試一次。○乾隆元年覆准。每逢鄉試之年。貢監生有願考職者。定期於五月內

欽派大臣考試。如遇

恩科不考職。○五十六年議准。貢監生停止考職。如

將來不敷錄用。再行的議奏。

聞請

旨。○嘉慶四年。欽奉

恩詔。貢監仍派大臣官員考定職銜。照舊例送吏部註冊。欽此。遵於五年分舉行一次。當經奏准。嗣後非奉特恩考試。仍照舊例辦理。

欽定大清會典事例卷一千一百一

國子監

官學規制 八旗官學一

八旗官學。○順治元年定。八旗每佐領下各取官學生一人。八旗各擇官房一所。建為學舍。以教八旗子弟。每旗設學長四人。以國子監二廳六堂教官為教習。除每月逢六日各師長率各旗肄業子弟赴監考課外。令祭酒司業等不時稽察。分別勤惰以示勸懲。○二年題准。八旗滿洲子弟就學肄業。合兩旗為一學。共官學四處。

每處教習十人。除每十日赴監考課外。每年春秋各於本處演射五日一次。又定酌取京省生員教習八旗子弟。每月給米二斛。以資養贍。三年內果教習有成。由監咨吏部考用。又禮部奏前此八旗官學生每佐領下止取一名。以十名習漢書。餘習滿書。得就學者無多。請增廣額數。奉

旨。每佐領下增取一名。於原額習漢書十名外加增十名。餘俱習清書。不論文武官員子弟。由各佐領選擇。移送國子監。十一年覆准。八旗每佐領下仍止留

官學生一人。由禮部會同國子監詳加查驗。如
學業無成者。各歸本旗當差。其缺另行選補。嗣
後三年一次查驗。永為定例。○十二年覆准。停
取八旗教習生員。禮部會同國子監於監生中
嚴加考試。選補教習。有成優加錄用。○十三年
議定。滿洲蒙古學生。每佐領下止留一人。漢軍
學生。每佐領下一人。外應添一人。○十四年奏
蒙古學生。兩佐領下一人。漢軍學生。或仍舊制
每佐領下二人。或照滿洲例。每佐領下一人。奉
旨。漢軍學生。每佐領下一人。○十六年題准。教習既改

用監生。今後考選教習。令本監自行取用。○十七年覆准。考選教習。止用恩拔副歲貢生。其准貢例貢。不准考取。○十八年議准。滿洲漢軍加增官學生額數。每佐領下二名。一習清書。一習漢書。止於武員及甲兵等子弟開送。文員子弟不准開送。○康熙元年奉

旨。八旗文員子弟。仍得充官學生。○又定。八旗官學生。每月赴監講書一次。繙譯一次。五日射箭一次。○又定。八旗滿洲蒙古漢軍隨印外郎缺出。由本旗咨報吏部行文到監。於本旗年久官學生

遴選一人。咨送吏部考試繙譯。○三年議准。八旗教習。將在監恩拔副歲貢生齊集間補。○四年奏准。停止恩拔副歲貢生教習。於官廩准例監生內未經考職者考試補用。○六年議准。教習缺出。先儘恩拔副歲官廩生等。如無此項人等。仍將准例監生考取。○又議准。舉人願就教習者。與恩拔副歲官廩准例監生一例嚴加考試。凡遇缺出。於五日內傳集應考諸生。彌封試卷。封門出題。即日取定。不許將文理荒疏者充數。○十一年奉

旨酌減八旗官學生額數。禮部議准。滿洲漢軍學生。每
佐領下存一人。蒙古學生。出學甚難。又有廕生
監生。間補。每二佐領下存一人。○十二年議准
從前停止恩拔副歲貢生充教習。故將官廕准
例監生充補。今議覆仍照舊例。令其考充教習。
其舉人。官廕准例監生。應停考用。○又定恩拔
副歲貢生考充教習者。連坐監期。積三十六月
報滿。○十六年議准。八旗官學生。先儘生員俊
秀選補。如本佐領下不得人。准補間散。○三十
二年

諭幼童惟在訓迪。苟加意教誨。未有不成者。騎射與文字。原宜並重。不可偏廢。滿洲通文義官員。即用之行間。未嘗不可。近見國子監教習官學生。甚屬委靡。大不及前。即八旗教習幼童。亦皆懈怠。現在八旗幼童。務宜選擇良師。勤加訓誨。爾等傳諭知之。○五十年議准。八旗官學生。隨貢監生分撥各堂。鑲黃旗在東講堂。正黃旗在西講堂。正白旗在率性堂。正紅旗在修道堂。鑲白旗在誠心堂。鑲紅旗在正義堂。正藍旗在崇志堂。鑲藍旗在廣業堂。令八旗助教設立公座。每逢進署之日。季考月課。

之期。先赴本堂謁見。使坐立有所。且杜頂冒之弊。○又定。改設八旗四學。每兩旗共一學。○雍正元年奏准。於八旗蒙古護軍領催驍騎內。有通曉經籍明白。繙譯熟練國語蒙古語者。選取蒙古教習十六人。分旗在學。與助教一同教習蒙古官學生。○又議准。官學生不可濫取。應於該佐領下。無論官兵子弟。不許瞻徇情面。擇其資性穎秀。可以讀書上進者一人。該參領佐領保送。該都統等驗看。移送國子監肄業。○二年覆准。令祭酒司業傳助教教習等。每月親臨官

學。不時巡察。獎勤儆惰。每月傳至監考試一次。
○五年

命八旗官員子弟十八歲以下者入學讀書。時部議八
旗子弟不能習文者。令其披甲學習騎射。向來
帶赴外任之處。永行停止。○又定。凡選擇官學
生。不拘門第。務擇聰明俊秀子弟。年幼者令學
清文。稍長者令學漢文。向例八旗每佐領必選
一人。今酌定一旗額設官學生一百名。分派滿
洲六十名。以三十名習清文。三十名習漢文。蒙
古二十名。漢軍二十名。缺出。通在一旗選擇。不

拘佐領申送本旗都統驗看。交國子監當堂挑取。○又議准。向來每旗官學共十三四間不等。實屬狹隘。應請將現在官房交還。每旗別給官房一所。二十餘間。量可容百人誦習者。著該旗修理。俾諸生聚處其中。○又議准。於八旗養育兵額內。撥出滿洲三十名。蒙古漢軍各十名。將所有錢糧分給官學生。計滿洲蒙古學生每月銀一兩五錢。漢軍學生每月銀一兩。由本旗關領。○又覆准。官學生習漢字者。每旗設教習五人。輪流更代。功課難以稽查。令該教習每人分

定學生若干人。日處學中。專心訓課。每人月支
廩銀二兩。米二斛。在戶部關領。每年給夏秋衣
一襲。二年給冬衣一襲。在工部關領。○又覆准
漢教習每旗定為五人。入館後本監堂官不時
稽察。懶惰者即行斥退。其勤謹無過者。三年期
滿。照例咨吏部以知縣序選。如有善於誘誨者。
再留三年。俟六年期滿。咨部以知縣即用。○六
年。

命國子監八旗各立一學。其二十歲以下。十歲以上。俱
准入學。○又議准。國子監設有八旗蒙古官學。

其內蒙古學實屬多設。應將內蒙古學裁去。其
裁退學生歸國子監官學。遇缺即補。○十年奏
准。八旗漢軍內記名舊家大臣子孫無力延師
者。左翼二十一人。右翼十一人。每人月給銀二
兩。令其各就本旗官學讀清漢書。○乾隆元年
議准。八旗世爵年二十以下者。分撥各旗官學
一同教習。每學各增漢教習一人。各撥教射教
習一人。○三年奏准。八旗子弟選取入學。三年
之內。令其專誦經書。朝夕講課。三年後。監臣考
驗。擇其材質聰穎有志力學者。歸漢文班。分隸

漢教習。令其專心講誦。其年齒已長。願學繙譯者。歸滿文班。分隸滿洲助教。令專心學習繙譯。○又奏准。學生歸漢文班者。不必專讀四書。亦使講求經史。為有用之學。每三年。監臣錄其可。以應考者。奏請。

欽點大臣到監考驗。取其明通者。投為監生。由官學而升太學。使與拔貢等究心明經治事。期滿擇尤異者。一同保舉考選錄用。○又奏准。八旗世爵。在官學學習三年。期滿引。

見錄用。其雖滿三年。而年未及二十歲者。仍留學讀。

書。俟滿二十歲。然後請

旨考試。○六年奏准。官學生歸漢文班者。邇年以來。頗知奮勉。但諸生年幼。度其資力。止能於四書外專習一經。史冊浩繁。驟難責其研究。現在加意教導。明年八九月間。擇其可以應考者。奏請欽點大臣。試以經文一篇。論一道。其中文理明順者。酌量拔為監生。令該旗註冊。咨送本監。與漢貢監生一同肄業。講求明經治事之學。期滿果有尤異者。准予保舉。○八年奏准。官學漢教習。每人給印冊二本。該教習將三年內所教學生若

千名。並學業功課。詳細填註。俟期滿時。一冊交
新教習收存。照例填註。一冊呈送監臣察覈。慎
重分別。如有實心訓課。著有成效者。列一等。其
訓課勤謹。稍獲成效者。列二等。出具考語。繕單
引

見。一等者可否用為知縣。二等者或用知縣。或用教
職。恭候

欽定。仍歸原班銓選。其列一等者。仍照原議。今在學
再行教習三年。果實心實力。始終如一。再將教
習成效。敘入摺內。填註考語。引

見准以知縣即用。○十年奏准。嗣後蒙古教習酌以
五年期滿。監臣詳加考覈。實不能教導者。斥令
歸旗當差。如有為人明白。實心訓課者。分別等
第。填註考語引

見恭候

簡用。記名註冊。以應升之護軍校。驍騎校。補用。仍留
在學行走。由監行文該旗。遇有員缺。與在旗應
升人員。分班間補。○十六年奏准。向來官學漢
教習員缺。仍由監臣將肄業之恩拔副歲優各
貢生考取充補。嗣後先期請

欽派大臣一二人至監。會同監臣。共同考取。將試卷
彌封詳閱。○十七年奏准。八旗世爵。既經於兩
翼設立世職官學教導。將現在官學肄業之無
世爵子弟。咨回各旗外。所有八旗官學。各增設
之漢教習一人。相應裁汰教射教習。亦咨回本
旗行走。○又奏准。教射教習。既經咨回。則每學
教射。未有專員。蒙古教習。每學現設二人。但蒙
古學生止二十人。內有他處行走。例不開缺。實
在不過十數人。毋庸二人教習。嗣後止以一人
教習字話。以一人教習騎射。行文該旗。遴選語

音嫻熟弓馬可觀者充補。○十九年議准官學教習二等人員歸班以知縣用者。遇有各省揀選。例得赴挑。其一等留學者。如不准赴挑。得官或反在二等後。未為平允。嗣後留學三年之內。亦准其一體赴挑。○二十六年

諭各處教習。三年期滿引見。並無一二等之分。惟國子監有之。此例徒足開士子捷徑。於實政殊無補益。將謂一等者為優。則該監之列在二等者。初不謂之劣。而一則歸本班銓選。一則留學以知縣即用。且留學三年。既以知縣即用。而又豫為聲明。遇揀發時一體

挑選。是名為學校收課士之效。而實為上下其手。啟
連化之門。於教學用人。俱無實濟。嗣後此例著停止。
毋滋傲幸。其如何詳定章程之處。該部定議具奏。欽
此遵。

旨議定。嗣後毋庸分別等第。並毋庸留學。惟令國子監
堂官照各處教習之例。將其平日教導如何之
處。出具切實考語。奏明帶領引

見。或用知縣。或用教職。恭候

欽定。其以知縣用者。俱令歸班候選。○二十八年覆
准。考試八旗教習。改歸

午門內朝房考試。其校閱試卷。既請

欽派大臣。毋庸會同本監堂官公閱。○三十一年覆
准。八旗官學。照蒙古教習之例。每學改添滿洲
教習一員。專訓繙譯及清書。漢教習名下。既已
撥出繙譯學生。則所教者不過十餘人。自應裁
減一缺。儻各學生有文理不通。經書不熟。責成
漢教習。繙譯及清語平常。責成滿洲教習。所有
添設滿洲教習。照考取覺羅滿洲教習之例。由
八旗文進士舉人。繙譯舉人。恩拔歲副貢生。文
生員。繙譯生員。廢員及筆帖式內。監臣請

旨考試。其應給公費米石等項。即將裁汰漢教習應領之項給予。又官學生按月給予錢糧。免挑別項差使。俾令在學肄業。若不嚴定章程。恐日久反啟規避之漸。嗣後凡八旗十八歲以下在學肄業官學生。統以年滿十年為率。習漢文者不能進學。習繙譯清文者不能考取筆帖式庫使。概令咨回本旗。另挑差使。○三十三年奏准咸安宮官學。八旗子弟及三旗包衣子弟均得選補。八旗官學。專補八旗子弟。

景山官學。專補上三旗包衣子弟。俱有定缺。禮部

八旗義學無定額。聽有志讀書無力延師者投呈充補。下五旗包衣得入此學。自乾隆二十三年部議裁去禮部義學。各學生俱有可歸之學。惟下五旗包衣無學可歸。嗣後每旗各設官學生十名。滿洲六缺。蒙古二缺。漢軍二缺。附入國子監八旗官學。○三十四年覆准考試官學教習。照吏部考試候補筆帖式之例。改歸貢院考試。派監試御史二員在場稽察。○三十五年奏准八旗官學滿洲教習。照

咸安宮官學

景山官學及宗學覺羅學等各官學滿洲教習之
例歸禮部奏

聞考試酌量多取數名。缺出時由監行文禮部於考
取人員內按次補用。○三十六年議准八旗官
學生凡有考取貼寫中書筆帖式庫使等官者
即令出學。其缺另行挑補。○三十七年奏准八
旗官學生考取文生員繙譯生員如在學已滿
十年者該助教帶領呈堂量予去留。○四十二
年覆准考取八旗官學漢教習向例由國子監
承辦嗣後由禮部行文國子監移取肄業正途

貢生名冊。照各學教習之例。一體奏請考試。即令該管助教等按名識認。如有徇隱搶冒等弊。監場御史即將該助教等查叅議處。又覆准官學教習。不得兼館行走。○四十九年覆准。官學教習報滿後。令其仍居學中。照常訓課。俟應補之人到學。始令離學。其應得之費。仍按日支領。俟離學之日扣止。○又覆准。新補教習已赴部驗到。而到學遲延至十日以外者。照京官赴任。違限十日例議處。於補官日扣俸。至該管各學教習衙門。嗣後於教習扣滿之日。先期一月

咨會吏部。俾應補之人。早傳送補。○五十二年
奏准。教習期滿。令該管官遵例。出具切實考語
送部。由吏部帶領引

見。○五十三年

諭。向來宗人府國子監等衙門。遇有引見之人。俱係由
本衙門自行帶領。上年宗人府。因有覺羅教習進士
期滿。帶領引見。並不查明向例。率行請用主事。經吏
部查出錯誤。參奏。並請嗣後。將各項期滿教習。俱咨
送吏部查例辦理。帶領引見。毋庸本衙門自行帶領。
固為防弊起見。但念該衙門。雖有兼管王大臣。其餘

堂官職分較小。而習練日久。將來即可備卿貳之選。若遇應行引見人員。俱歸吏部帶領。則該堂官無由時時瞻對。非朕取材鑒別之意。嗣後宗人府內務府國子監景山咸安宮等學。應行引見教習。仍著該堂官自行帶領。惟將應以何項請用之處。先期向吏部查覈。候部查覆到日。再行遵照辦理。儻有不合定例。辦理錯誤者。著吏部據實叅奏。○五十四年奏。八旗官學出色學生。加給錢糧奉

旨。此項官學生額缺。每旗於百名內裁去十名。添作出色學生膏火。以示勸勵。固不為多。但於其中挑取十

人給予雙分錢糧。未免過優。嗣後如遇甄汰時。百名內陸續裁扣十名。挑取多熟經書文理明順者二十名。將此十名錢糧。分為二十分給予。既足以昭鼓勵。又可以多育人材。較為兩有裨益。○嘉慶二年奏准。官學生非生員出身。而材質可造。學有進益者。平時未得與試。於報滿之年。遇有考中書筆帖式庫使等項。其考試或在三月以內。或在半年以內者。酌量留學。俾得與試。如期尚遠。仍不准留學。致占額缺。○四年議准。八旗教習期滿。照咸安宮景山等處教習之例。以所教學生曾否中

式入學考取中書筆帖式繙譯著有成效者。聲
明咨部以定引。

見准駁。又議准八旗官學生。每逢國子監季考。年
十四歲以上者習步射。十八歲以上者習騎射。
○七年奏准漢軍外郎停止揀選官學生。嗣後
於考試繙譯場內。令漢軍官學生與該旗漢軍
生監一體考試補用。○十四年

諭國家設立官學。教育旗人。原冀培養英賢。為朝廷宣
猷效職。無如行之日久。僅視為八旗子弟出身之階。
而教習各員。亦不深探本原。盡心誨迪。但停年期滿。

薄有課程。即得邀恩錄用。由是積習相沿。有虛名而無實效。夫士人讀書致用。本以講明義理。端身心性命之準。若但知從事文藝。而置聖賢誠正修齊之學於不問。即幸獲進階。服官登仕。其於修己治人之道。懵無所知。將何以仰副興賢育才之意乎。至尚儉黜奢。尤為興廉善俗之本。朕謹身節用。首崇儉樸。特頒御製訓誥。臣工內外大臣庶僚。皆當恪遵明訓。砥礪廉隅。其官學子弟。蒙養初基。自應力戒浮靡。導歸淳樸。嗣後著管理官學各大員。嚴誠教習人等。毋得玩日曠時。務與授業各學生。講明四子之書。剖析五經。

之義。俾童年收辨志之益。壯歲植立身之基。其有心性浮華與服侈肆者。隨時嚴加戒飭。如教習不守程規。子弟不遵化誨。即分別斥革懲處。以冀崇實黜浮。用副朕厚望旗人至意。○十六年

諭

八旗設立各項官學。選用滿漢教習。責成訓課。立法已為詳備。惟因循日久。積漸廢弛。學生僅圖沾潤膏火。教習惟冀如期報滿。以為進身之階。竟至官學之設。成為具文。嗣後稽察各官學大臣等。務當實心考察。俾各教習勤加訓課。各學生認真肄業。其幼官學義學及弓箭教習等。並著各該管大臣等一體查覈。

務期立有成效。不致有名無實。以副朕教育人材至意。○二十四年

諭國家設立官學。設有滿洲蒙古漢人教習。分別訓課。原以培養人材。乃近來視為具文。各學官學生。並不常川入學肄業。該教習等亦止於查學之期。始行到學。至報滿時。如無成效。輒以通融塞責。著通諭查學大臣及國子監堂官。不時前赴各學稽查。如教習有曠功不到者。即行指名叅處。其官學生不入學肄業。及到學而不遵約束者。亦即嚴行戒飭。教習報滿。若無成效。仍令留學。不准通融捏報。○道光三年奏准

官學生考取文生員繙譯生員以考中之日為始。留學肄業。扣滿十年出學。如再考中副榜拔貢優貢等項。復以中式之日為始。扣滿十年。俾得底於有成。○四年奏准。蒙古助教缺出。蒙古繙譯進士舉人。得與蒙古筆帖式教習一體考試。○五年議准。大挑二等滿洲蒙古文舉人。遇滿洲蒙古助教缺出。先用二等舉人一人。次用正班一人。○六年

諭國家設立官學。月給廩餼。所以造就人材。各教習自宜勤加董率。俾肄業生徒認真講習。以收師儒之益。

若如御史所奏。近年生徒入學。不過輪期。畫到。查學之日。教習擇其在家課讀者。背誦數章。塞責。教習亦止於畫到。查學時。始行到學。間有在學住宿者。並不教讀。其宗室覺羅及咸安宮景山各官學。亦復如此。積習相沿。日就廢弛。不可不嚴行飭禁。嗣後各學教習及肄業生徒。務須常川入學。盡心訓課。並責成查學大臣及國子監堂官。不時稽查。如有曠誤。指名叅處。毋得有名無實。日久仍成具文。○八年

諭。李宗昉等奏。新選蒙古助教明魁。係二等文舉人銓補。不諳蒙古繙譯。難資訓課。是其未經考選。僅以班

次輪用。遂得濫竽。殊於督課名實不符。嗣後著仍復舊例。由理藩院會同國子監考試通曉滿洲蒙古繙譯者。擬定正陪。候旨引見錄用。不得以二等文舉人銓補。現補蒙古助教明魁。著即撤任。交吏部遇有各項科甲小京官缺出。不入班次。儘先補用。○九年議准。教習原定五年分發之例。改為三年後呈請分發。○三十年五月

諭御史麟光奏整頓學務一摺。國家建立官學。原以教養宗支及八旗子弟。自應循名責實。毋令曠功。據稱近日各學勤學者少。僅止按時呈交月課。多不入學。

殊非認真教督之道。嗣後著管學王大臣嚴飭該學正副管助教教習等。督率諸生。勤加講課。以整學規。毋任虛糜餼廩也。

